



臣朱壽朋敬編

臣張毓英恭校

五月壬午朔諭兵部左侍郎總管內務府大臣師曾年逾八旬步履漸形衰邁著以原官休致惟念該侍郎平日當差勤慎著加恩賞食二品俸○甲申諭御史瑞良奏匪徒迎神進香敗俗釀弊請旨禁止並嚴申門禁一摺據稱永定門外南頂地方廟宇向於五月間迎神進香男女雜還竟有公侯大員都院職官微服冶遊其間致有馳騁車馬壓斃幼孩等情甚至永定門亦遲至亥刻始行掩門等語如果屬實殊屬不成事體著步軍統領衙門南城御史嚴飭營城司坊各官一體嚴行禁止倘敢明知故縱即行從嚴參辦並分飭各城門該管營汛員弁務當遵照向章按時啟閉以重門禁○命容貴爲總管內務府大臣○轉巴克坦布爲兵部左侍郎以壽蔭爲兵部右侍郎○邵友濂奏臺灣孤懸海島屏蔽七省設立行省外固海防內辦撫墾均須重兵擇要布紮訓練防守全臺原有三十一營十七哨屯軍五哨礮勇五哨練軍三營嗣因內山大嶺崁一帶社番滋事兵力單薄當經奏明添募四營以資兜剿計截至光緒十七年底止淮軍共三十五營十七哨屯軍五哨礮勇五哨練軍三營業經將官弁兵勇名數餉數及統領營官接

卸日期及駐紮處所按季分別開單造冊奏咨查核其修建西學堂基隆海口洋式礮臺臺灣等縣衙署監獄壇廟祠宇等項工程添購外洋器械以及一切籌辦情形均先經隨時分別奏咨在案茲據臺灣善後局司道詳稱臺灣籌辦海防善後并招撫事務自光緒十七年正月起到十二月底止海防善後報銷新收臺灣關稅鹽課釐平餘及選刪等欸銀一百五十五萬四千六百一十九兩零開除及給准軍官弁勇夫辦公經費薪糧柴草工食礮勇輪船弁勇屯丁鹽糧水陸練兵薪糧公費隨營文武員弁及各局員役鹽菜夫折購買外洋軍火器械價值正腰站書兵工食修建西學堂書院洋式礮臺恆春縣城垣兵勇營房倉庫衙署監獄壇廟祠宇基隆社蔡浮橋平船各工製造旗幟工料以及一切雜支各欸共銀一百九十四萬六千五百三十六兩零或循照例章或接續支給或購自外洋恪遵定章先已奏咨在案均係實用實銷委無絲毫浮冒應請全數准銷除新收銀一百五十五萬四千六百一十九兩外尚不敷銀三十九萬一千九百一十六兩零又光緒十六年臺防善後報銷案內不敷銀八萬六千一百四十兩零統共不敷銀四十七萬八千五十六兩八錢零實係欠給各軍弁勇光緒十六十七兩年分薪糧等銀容俟續收十八年起臺防經費卽行分別給還等情前來臣覆核無異懇 恩飭部全數准銷以清欸項下部議奏○乙酉諭總理海軍衙門奏琉璃料件逾期尚未解足請旨飭催一摺現在各處工程應用琉璃瓦

料該署入解數目甚多著工部嚴催該監督飭催該商將欠解料件務於六月內一律解齊以重要工倘再稽詞延宕卽由該衙門據實奏參○諭倉場衙門奏倉廩不戒於火分別參辦一摺據稱本月初一日未刻北新倉失火延燒光字空廩當卽撲滅請將該監督議處並自請議處花戶人等送部訊究等語北新倉不戒於火延燒空廩其中有無別項情弊亟應澈底根究所有該倉花戶人等著交刑部嚴行審訊務得確情按律懲辦署監督普英監督蔡蔭椿疏於防範著交部分別議處祥麟許應驤著一併交部議處○丙戌諭福潤奏已革知縣虧短交代銀兩請旨查抄監追一摺已革山東陽信縣知縣焦維霖前署惠民縣任內虧短正雜各款爲數甚鉅迄未完解實屬玩延焦維霖著卽監追提集經手書吏分別訊明究辦一面將該革員任所寓所資財嚴密查抄並著兩江總督江蘇巡撫將該革員原籍家產一併查封備抵以重庫欸○己丑夏至大祀 地於 方澤 上親詣行禮○乙未諭軍機大臣等有人奏山東招遠縣掖縣盜風日熾掖縣城東滕家村滕廷翼家今春被盜撞門入室搶劫財物鎗斃僕人刀傷事主兩縣似此盜案甚多十無一獲曾經該處村民獲盜一名送縣並不審訊竟自開釋等語著福潤嚴查懲辦據實具奏原片著鈔給閱看將此諭令知之○丙申諭御史張仲炘奏五城水局保舉員紳請飭部嚴定章程一摺著吏部議奏○諭御史張仲炘奏本年考試試差繼燭者竟有十數人之多遲至戊正三刻始

畢請飭申禁等語向來試場不准繼燭例禁甚嚴至各項殿廷考試尤宜恪守成規若如該御史所奏尙復成何事體嗣後殿廷考試著王大臣等認真稽查嚴行禁止以符定制○李鴻章奏臣於上年三月間籌議熱河善後事宜以亂後伏莽未淨酌留古北口練軍各營擇要分駐巡防奏明在案該軍本係提標抽練勁旅近歲海防關係重要提督常駐蘆台所部練軍五營先有一營出駐朝陽一營留駐古北口其餘三營均調赴蘆台駐紮環顧大沽口北塘口後路未便久留塞外致海口要地轉覺單寒竊維熱河地方周圍二千餘里東連奉吉西接多倫北近圍場實爲京畿屏蔽該處流民四集客匪錯居向多馬賊出沒每以數十騎聯鑣疾走到處劫掠飄忽異常兵燹之餘蒙漢積仇未解民教構釁相尋時欲乘機起事疊據留防各將領稟報隨時訪拿嚴辦迄未能淨絕根株建威銷萌全在兵力臣悉心體察非有常駐之主兵不足以資鎮攝非練得力之馬隊不足以備搜巡伏查直隸練軍馬隊章程係前督臣曾國藩及臣先後斟酌奏定餉章營制損益得宜迄今二十餘年各營遵守規條操巡認真緩急可恃上年剿辦朝陽教匪尅期掃蕩全賴練軍之力成效昭然現擬仿照辦理就地抽練馬隊專爲熱河防圍之兵全隸地面太廣防範本屬難周僅練一營則不敷分布若練兩營則餉需過鉅難於支持惟有因地制宜酌量變通期於餉項可以節省而兵力又能兼顧查承德灤平豐寧圍場爲河屯協副將汛地平泉建昌朝陽赤峯



爲八溝營參將汎地均隸於古北口提標其弁兵素習地利尙能耐苦疊與都統臣奎斌提督臣葉志超往返籌商擬於該兩營內每營抽調精壯一百五十名各練成馬隊一旗分爲三哨卽以該副將參將爲管帶現署副將譚興魁署參將汪隆元俱久任邊缺曉暢營務可期得力官則原營兵皆土著配給精利鎗礮督令認真操練平時查拿奸宄緝捕盜賊一遇有警朝發夕至便於赴機較之添練客兵實爲事半功倍該營兵將本隸提標仍由提督督飭訓練有事則歸都統節制調遣與原有朝陽馬隊一營及圍場之馬隊百名互爲援應足壯聲威俟成軍後卽可將新派出防之蘆台練軍察酌情形陸續撤回如此則邊防常有精練之師而海防亦無空虛之慮洵爲永遠至計現兩旗管帶卽是本營將領以後必須慎選精悍能戰之將俾充是職月支薪水公費馬乾等銀應照練軍奏定章程各半支領字識薪水照章減一兩五錢其幫辦官哨官督隊等官薪水馬乾及什長親兵正兵等口糧馬乾均照章給發計馬隊六哨大建月需薪公餉乾柴草等銀二千七百二兩有奇小建月需銀二千六百二十四兩有奇每歲約共需銀三萬一千九百六十餘兩除原有底餉銀五千一百六十八兩五錢二分抵支外實需添撥銀二萬六千八百餘兩直隸餉源雖極支絀事關邊防大局自應竭力代籌此項應添餉需卽飭由練餉局設法勻撥徑給該管帶官領放以歸劃一至成軍之初製辦旗幟號衣等項照章由局核給一次此後卽由管帶官

自行設法修換其兵丁馬匹贖價銀照章由局暫借在各兵應領餉項內分月扣還統由練局彙案造報  
得 旨如所請行○丁酉 上詣 大高殿祈晴○戊戌兵部右侍郎沈源深卒賜卹如例○辛丑以會

章爲內閣學士○依克唐阿奏奴才准會典館咨欽奉 上諭開辦會典所纂圖說於直省沿革疆域天

度城署山水鄉鎮屯站各條均須詳實查黑龍江送到十冊所開多有未能詳細畫一者逐層指駁二十

一條並附表格式樣以爲程式咨行迅派幹員分投履勘詳查比較踰度嚴催趕辦以期確實等因前來

當卽通札各城一律派員遵照趕辦去訖疊據各城報送遵照館咨附表格程式繪造圖冊到省隨飭承

辦各員細加核對所有黑龍江墨爾根呼倫貝爾興安城布特哈五城圖冊均屬未能詳實且與程式仍

多不符其天度一條無人通曉未經照辦而呼蘭巴彥蘇蘇北團林子三城圖冊亦未能急切照辦奴才

伏念奉 旨欽辦事件未便以本省無人通曉天度敷衍遷就當卽電致天津代訪精於測量之人北來

襄辦地勢踰度惟黑龍江幅員遼闊山則有內興安嶺正幹自喀爾喀車臣汗科爾沁部界之索約爾濟

山東入呼倫貝爾界其支幹或分或合環繞於黑龍江右岸松花江左岸爲五城盤輿之山諸河發源之

本其脈絡聯綿或起或伏寬厚有千餘里者有數百里者不等長大總在六千餘里其間重岡疊嶂亂

聳拔樹木葱蘢溪澗錯雜不可勝計水則有黑龍江松花江額爾古訥河克魯倫河環繞三面爲全省諸

水歸宗巨川計其長遠亦在萬里之外其中之嫩江海拉爾河喀爾喀河漠河瑚瑪爾河呼蘭河伊春河諸大水悉發源於嶺之四面水之小者千派百流盡行匯萃而注之江湖其源頭流過龍口各地方均屬不能切實且秋冬積雪堅冰至四五尺行人不能踐履春夏泥濘坑澁深莫能測又兼大河無渡阻隔不通實爲人跡難到之區今既派員分往周歷履勘必須相機前進親臨山麓水源所在方能測其水之深淺山之高斜上與天度符合繪圖註說乃能得實然事爲地限人力亦有不能施將來承辦各員任此艱難事件能否悉合館章非奴才所敢懸揣卽使往返履勘詳實測繪或與表格程式大致相近而逐條按圖核對詳註總分各說尤非朝夕所能竣事合無仰懇 天恩俯念邊省地方曠遠創辦測繪圖冊事事維艱相應請 旨寬予展緩限期容 奴才督飭測繪各員分往各城按照館章測量繪成圖冊再當派員送館得 旨如所請行○乙巳命懷塔布管理戶部三庫事務○諭軍機大臣等有人奏書吏交結訟棍請飭拿辦一摺據稱直隸通永道衙門書吏諸錫庚交結訟棍張乃庚趙和順等同謀造意囑令因案脫逃之永平府民人王鴻達捏控商民李天爵諸錫庚賄託委員楊春元將李天爵監禁數月並不審訊張乃庚趙和順現在宣武門外鐵門峻太永煤棧藏匿等語所奏如果屬實亟應拿究懲辦著李鴻章孫家鼐孫楫按照原參各節確切查明據實具奏○己酉李鴻章奏北洋海防用款前經總理各國事務衙門



會同戶部奏明由督辦大臣咨報總理衙門戶部查核嗣於光緒九年八月部議行令三部分銷歷經循照辦理自十五年正月起北洋海軍各船俸餉悉遵海軍衙門奏定章程分別開辦經臣奏明遵照新章收支另作起訖以清界限已將十五年第一案收支各款造報內有兵部行查各款業經另文登覆餘均奉部准銷在案茲據海防支應局司道詳稱十六年分第二案收支北洋海軍經費仍照新章接續造報前已將新支及更定各款照章造冊請立案聲明舊有支款毋庸再行立案計十六年分北洋海軍報銷第二案舊管項下截存銀八萬六千六百六十七兩零新收各省關解到稅釐銀一百三十八萬七千八百八十兩零又各處解還領用軍火價銀一千六百九十五兩零准餉協撥行營製造局造子薪工及電報學堂經費銀二萬三千九百三十兩零北洋電報官局收繳商報信資銀一萬二千五百二十六兩零扣存京平平餘銀三萬六千三百六十八兩零收回十五年分兵部刪查駐陽四蚊船並敏捷船礮弁及海軍學生劉善選薪糧等項銀一千八百四十四兩零共新收銀一百四十六萬四千二百四十六兩零連舊管共銀一百五十四萬四千九百十三兩零內除扣存平餘銀三萬六千三百六十八兩零係應解海軍衙門之款卽在十七年應領鎮遠等七船備用款內劃抵歸入七船案內列收造報又天津機器局十六年添造新式長礮鋼彈栗色火藥經費銀四萬兩由該局自行造報分別照數登除外實計收用銀一

百四十六萬八千五百四十五兩零開除項下應歸戶部核銷各款內水雷魚雷等營共支銀五萬七千三百十二兩零學堂船塢電報醫院各局藏等處員弁人等共支銀二十萬七千九百二十二兩零學堂船塢礮臺練軍等處僱用教習洋員共支銀三萬七千八百二十四兩零出洋學生及雜支等項共支銀九千一百七十一兩零淮餉協撥造子薪工及電報學堂等項共支銀二萬二千八百四兩零應歸兵部核銷各款內海軍員弁兵勇俸餉共支銀二十八萬一千三百四十四兩零各海口及內河輪艇共支銀四萬九百二十五兩零各兵輪僱用教習洋員共支銀五萬一百九十七兩零郵費運腳等項共支銀四萬一千五百九十八兩零應歸工部核銷各款內采買等項共支銀四十六萬二千八百七十六兩零各項工程共支銀五萬七千二百三十兩零各處修理共支銀四萬三千三百二兩零各項製造共支銀十一萬三千五百二十九兩零統共支銀一百四十二萬六千三十八兩零其餘銀四萬二千五百六兩零已接支十七年以後用項無存循案造具三部分銷細冊收支四柱總冊開具欸目清單詳請奏咨核銷前來臣查十六年分北洋海軍經費係由海軍衙門按常年額支之欸核定指撥以供計授要需遇有必須添購要件添建要工不在歲撥數內者照奏定章程本應另請添撥惟海軍衙門同一艱窘深恐籌撥為難姑由工需雜支項下截長補短竭力騰挪湊辦值此時艱餉絀非特新增用項必加詳審卽舊有支

款亦由臣督同在事各員隨時考察可省卽省至常年操防應購外洋軍械器具等項其貴賤良窳尤必多方比較始行訂購惟海軍一切用款並無例案可循亦非他項軍需可比臣覆加查核均係實用實銷並無絲毫浮冒報聞○是月德意志國新簡駐華使臣紳珂抵任○奧大利亞國使臣畢格哩本回任六月壬子以衛汝貴爲甘肅寧夏鎮總兵○乙卯世鐸等奏本年二月二十六日內閣奉 上諭據總辦萬壽慶典王大臣世鐸等會同內務府奏稱恭查乾隆年間歷次慶典自西華門至西直門將兩旁街道鋪面量加修葺並搭蓋經壇戲臺分段點設景物各在案明歲恭逢 皇太后六旬萬壽可否照案辦理請旨遵行一摺朕謹援成案竭誠籲懇鈐奉 慈禧端佑康頤昭豫莊誠壽恭欽獻皇太后懿旨西直門外關廂一帶及城內蹕路所經著平治潔淨兩旁鋪面房間稍加修葺至點設景物等項著相度地勢酌量辦理不得踵事增華致滋糜費欽此朕仰承 懿旨欽悅實深卽著該王大臣等將一切應辦事宜敬謹妥議具奏欽此臣等遵卽相度地勢分別酌辦除俟查勘明確另行專摺具奏請 旨遵行外敬查乾隆年間歷次 慶典王公大臣以及京外文武官員各效微忱經 欽派大臣將大小臣工願輸經費分別開單進呈仰邀 俞允在案明歲恭逢 慈禧端佑康頤昭豫莊誠壽恭欽獻皇太后六旬萬壽普天同慶凡屬中外大小臣工皆願祝 嘏輸忱共襄 盛典臣等查照乾隆年間成案酌擬數目開具清

單籲懇 天恩俯如所請庶葵藿私衷稍伸萬一至應交款項臣等公同商酌在京王公及文武大小官員均在戶部呈繳其外省文武官員所交之款卽於各省藩庫運庫織造關稅等庫就近存儲聽候戶部提解統由臣等隨時支取備用再查乾隆年間各省鹽商皆有捐輸款項由各督撫奏明請 旨准其報効以遂衢歌巷舞之忱此次各該商衆如有照案呈請者應由各督撫據實奏 聞請 旨遵辦得旨如所議行 報効清單 親王郡王貝勒貝子公將軍共銀四萬三千六百兩宗人府內閣各部院寺滿漢文職各官共銀九萬四千八百兩侍衛處鑾儀衛八旗滿洲蒙古漢軍前鋒護軍圓明園八旗內務府三旗健銳營火器領綠步各營滿漢武職各官共銀六萬八千四百兩公侯伯子男輕車都尉騎都尉雲騎尉恩騎衛滿漢襲廕各官共銀五萬七千一百兩以上共報効銀二十六萬三千九百兩直隸省共銀五萬七千兩江甯省共銀三萬五千八百兩江蘇省共銀三萬五千六百兩安徽省共銀三萬三千五百兩山東省共銀五萬六千一百兩山西省共銀五萬一千五百兩河南省共銀五萬八千四百兩陝西省共銀二萬九千三百兩甘肅省共銀六萬六千五百兩新疆省共銀四萬六千八百兩福建省共銀四萬五千兩臺灣省共銀一萬三千四百兩浙江省共銀四萬三千三百兩江西省共銀四萬一千二百兩湖北省共銀四萬三千六百兩湖南省共銀四萬四千九百兩四川省共銀六萬一千八百兩廣東省共銀六

萬四千五百兩廣西省共銀三萬一千七百兩雲南省共銀三萬二千六百兩貴州省共銀三萬七千六百兩奉天省共銀五千七百兩吉林省共銀三千兩黑龍江省共銀一千兩熱河共銀三千二百兩以上共報効銀九十四萬三千兩統計京外各官共報効銀一百二十萬六千九百兩得 旨覽○丙辰熱河都統廷斌卒賜卹如例○丁巳以慶裕爲熱河都統○戊午諭吳大澂奏災區待賑請撥帑銀一摺湖南醴陵縣等處上年收成歉薄本年春間又苦旱乾饑民待哺孔殷亟應妥籌賑撫現經吳大澂先行借撥釐金銀二萬兩派員購米分投賑濟著由戶部卽行籌撥銀三萬兩交吳大澂分別歸還墊欸並撥往災區飭屬核實散放毋得假手書吏稍滋弊竇以副軫念民艱至意該部知道○上詣 奉先殿 壽皇殿行禮○庚申 上御承光殿德國使臣紳珂覲見呈遞國書○癸亥 上詣 大高殿祈晴○甲子以唐景崇爲翰林院侍讀學士○乙丑諭京師近日以來雨勢連綿不止十二日復大雨滂沱連宵達旦誠恐河流驟漲近畿一帶禾稼受傷著直隸總督順天府尹查明各屬被災之處妥籌賑撫迅卽馳奏京城內外倒塌房屋處所如傷倒人口並著步軍統領衙門順天府確切查明迅速奏聞以慰廛系○丁卯 上詣 大高殿祈晴○崧蕃奏普安直隸廳妖匪劉燕飛滋事攻撲廳城被兵圍堵剿立解城圍餘賊潰逃經臣等將大概情形於四月十三日恭摺具陳在案茲於五月二十四日由軍機處夾板遞回原摺奉



硃批卽著嚴拿匪首劉燕飛等務獲懲辦並將餘匪搜捕淨盡毋任漏網欽此欽遵臣等前於四月初五及十三十四等日據署普安廳同知戴斐章陸續稟稱匪首劉燕飛自三月二十九日被團練擊敗後該匪黨一由南里豆腐坡小山營馬坡逃竄一由北里白家坑水塘堡高利堡逃竄官軍團練或截擊來路或追襲後尾均有斬獲賊勢漸感遂退踞得勝營歸順營兩處並分竄廳南紙廠十里坪南俄十寨一帶四月初四日戴斐章會同分統劉仕旺派令曾光勝進攻歸順營圍首劉雲漢陳堯廷楊起鳳進攻得勝營立將兩處賊巢攻破生擒偽都督何馬掌一名陣斬賊匪一百二十餘名奪獲黃旗黃布號片多件解散脅從七百餘名我軍亦陣亡七名帶傷十一名初五初六兩日派黔援兵先後到廳安義鎮標練軍管帶馬定邦迎剿紙廠一帶格斃吳興舜等五名餘衆四散追撫提標練軍管帶譚盛高撫標練軍管帶潘輔漢各率所部追剿南俄十寨等處安南營練軍管帶池有蓮亦帶隊前往與水城交界之哥格子口防剿賊匪均聞風先潰逃竄廳東一帶經普安縣知縣劉保厚派團堵截陣斬匪目何中心崔小有楊狗三名餘衆四散廳之東北南三路匪黨悉平其另股由廳西竄入漏境先經平彝縣知縣賈汝讓親帶團勇於松子山架格山一帶防禦適雲南管帶綏靖中營練軍遊擊黃呈祥路經該處探知賊蹤與賈汝讓會兵擊之廳屬西路股匪亦全數肅清維時劉逆以脅從人等自潰敗後俱已解散遂率悍黨十數人意

欲潛渡紅水江入粵糾結再舉因練營團勇分堵要隘層層密布無隙可逃乃盤旋於普安安南貞豐三州縣交界之巖頓寨地方經安義鎮臣蔣宗漢偵探劉逆等藏匿處所派令隨員蔣關齡中軍守備何其榮等會同提臣所派候補都司王錫吉普安縣知縣劉保厚密飭團首孔金山杜僕臣等於四月十五日在冬瓜坡將首逆劉燕飛並偽帥譚遇金僞侯孫在亭三犯一併拿獲二十二日准安義縣咨報前來隨於二十九日派弁兵押解來省當經督同司道提犯訊明劉逆供係四川人潛來廳境始則捏造妖言繼以邪術塗面令人於黑暗中覘視隱隱有光詐稱金龍出現鄉愚詫爲神奇因此信從者衆遂自立僞號封爲僞職並與譚遇金孫在亭供認謀逆攻城等情不諱當卽恭請 王命將該三犯綁赴市曹凌遲處死傳首犯事地方懸竿示衆以彰 天討而快人心臣已擬疏脅從罔治告示徧發張貼並諭逃避良民急早歸農禁止團練藉端滋擾現據該處文武及各營稟報地方一律肅清籌辦善後清查保甲諸事已漸就緒臣等伏查該逆首劉燕飛以妖言倡亂聚衆數千攻城勢甚兇熾其中率多良民被其誘惑追經兵團擊敗衆識奸謀除甘心從逆者多被斬擒餘俱畏悔四散此皆仰賴 天威遠播鄉團忠勇將士用命力保危城卒使巨慙就擒餘匪殄滅兼旬之內事定民安雖逆黨保老四等尙待稽誅而兵團戮力同心不無微勞足錄所有在事尤爲出力文武紳團記名提督安義鎮總兵蔣宗漢擬請交部從優議敘候

補參將會光勝擬請以副將儘先補用雲南署平彝縣事南寧縣知縣賈汝讓擬請免補同知直隸州以知府在任候補普安縣知縣劉保厚擬請加同知銜並 賞戴花翎候選知縣蔣關齡擬請以知縣分省補用並加五品銜補用都司王錫吉擬請以遊擊留黔補用安義鎮標中軍千總何其榮擬請以守備升用並加都司銜貢生就職州同龍應門擬請以知州歸部選用歲貢劉雲漢擬請以州同歸部選用六品軍功柳家修擬請以把總儘先拔補龍應門劉雲漢柳家修並請 賞戴藍翎以上仰懇 天恩俯准給獎其陣亡候補都司徐炳文應請 敕部從優議卹其餘出力文武員弁可否容臣等擇尤彙案請獎得旨蔣宗漢等均著照所請獎勵餘依議該部知道○戊辰諭張煦奏查明應州等州縣上年被災較重請將應完本上年上忙錢糧秋後應徵米豆及帶徵民欠各項分別緩徵遞緩等語上年山西應州等處成災較重其未經報災村莊逼近災區小民謀食不遑情形亦甚拮据若將應徵錢糧照常徵收民力實有未逮加恩著照所請所有應州四鄉村莊應徵光緒十九年分上忙錢糧著緩至秋後併徵其秋後應徵米豆著緩至次年帶徵至上年成災八分之蘇家寨等六十村並大同縣寄莊之閻家堡等二村成災七分之二西輝耀等三十四村並大同縣寄莊之王家莊一村成災六分之義井村等三十一村蠲餘錢糧米豆等項原緩至光緒十九年秋後起分作三年二年帶徵者均著遞緩至二十年秋後起分年帶徵歉收

之劉家莊等十八村民欠錢糧米豆原緩至十九年麥後帶徵者著遞緩至二十年秋後帶徵南馬莊等五十八村尚有十八年上忙尾欠暨未完下忙錢糧米豆著緩至二十年秋後帶徵大同縣謝家店等二百九十村莊應徵十九年上忙錢糧著緩至秋後併徵其上年被災之謝家店等七十三村莊蠲餘錢糧米豆又歉收之二對審等二百十七村莊民欠十八年下忙錢糧米豆並未完光緒十四十五十六十七等年錢糧米豆原自十九年秋後帶徵並分年帶徵者均著遞緩至二十年秋後分別帶徵懷仁縣四鄉村莊應徵十九年上忙錢糧著緩至秋後併徵其上年成災之草地等三十八村莊並大同縣寄莊之小灘頭王家莊二村蠲餘錢糧米豆原自十九年秋後起分作三年二年帶徵並歉收之西小寨等七十九村未完十八年分錢糧米豆原緩至十九年麥熟後啟徵者均著一併遞緩至二十年秋後分別帶徵山陰四鄉村莊應徵十九年上忙錢糧著緩至秋後併徵其成災村莊蠲餘錢糧米豆並歉收村莊民欠錢糧米豆原緩至十九年秋後帶徵並分年帶徵者均著遞緩至二十年秋後分別帶徵代州逼近災區未完光緒十八年下忙錢糧米豆著緩至十九年秋後帶徵其未完光緒十七年分米豆著遞緩至二十年秋後帶徵保德州四鄉村莊應徵光緒十九年上忙錢糧著緩至秋後併徵石玉縣上年歉收各村民欠十八年未完錢糧米豆著緩至十九年秋後帶徵左雲縣四鄉村莊應徵光緒十九年上忙錢糧並帶徵